



KATRINA di atas puncak Gunung Kinabalu.

Ibu tunggal lancar aplikasi mudah alih di puncak Gunung Kinabalu

KOTA KINABALU: Seorang ibu tunggal kepada lima anak dari Kuala Lumpur berhasrat mencatat namanya dalam Malaysia Book of Records dengan melakukan pendakian paling banyak (sembilan kali) di Gunung Kinabalu dalam satu ekspedisi.

Pada masa sama, dia juga akan melancarkan aplikasi mudah alihnya di puncak Kinabalu.

Kartina Abdul Ghani, 53, melengkapkan beberapa pendakian pertamanya bermula 15 Oktober, dan masih mempunyai beberapa pendakian lagi sehingga 9 November, menjadikan jumlah keseluruhannya sembilan kali pendakian sepanjang tempoh itu.

Dia berharap untuk menggabungkan ketahanan, transformasi digital, dan kecerdasan buatan (AI) untuk memberi inspirasi kepada rakyat Malaysia dan audiens global dengan menunjukkan kemudahan pembangunan aplikasi mudah alih serta penggunaan AI yang betul melalui peralatan AMB Drag & Drop Mobile Apps Builder Toolkit yang dimilikinya.

Ekspedisi ini juga merupakan sebahagian daripada latihan Kartina untuk mencapai matlamat utamanya – mendaki Gunung Everest pada 2026.

Sepanjang ekspedisi Gunung Kinabalu itu, dia akan menerbitkan aplikasi baharu secara langsung ke

Google Play Store dan Apple App Store menggunakan platform kod rendah/tanpa kod miliknya setiap kali dia tiba di puncak.

“Matlamat saya adalah untuk menunjukkan betapa mudahnya bagi pengguna dari semua tahap kemahiran untuk mencipta aplikasi mudah alih, walaupun tanpa latar belakang teknikal,” katanya, sambil menambah, dia juga akan menggunakan peluang ini untuk mendidik orang ramai mengenai teknik penggunaan AI yang betul.

Berdasarkan kajian Kartina, 97 peratus pengguna AI tidak menggunakan alat AI dengan betul.

Dengan melakukan demonstrasi secara langsung dari puncak, dia akan menunjukkan cara yang betul untuk menggunakan AI bagi pertumbuhan peribadi dan perniagaan, sekali gus mencetuskan minat terhadap potensi teknologi AI.

Mengenai ekspedisi Everest, Kartina berkata pendakian Kinabalu ini hanyalah permulaan.

“Ekspedisi ini menandakan permulaan pelan latihan ketat yang direka untuk mempersiapkan diri mendaki Gunung Everest pada 2026,” katanya.

Katanya, dia akan menjalani latihan ketinggian di Poland, serta latihan pendakian di Gunung Muztagata, Gunung Lobuche, Gunung Manaslu, dan juga Kem Induk Everest.

1 4/11/2024